

## KAPEL DI ALTO VISTA TA UN CAS DI ORACION Y NO LUGA DI HACI NEGOSHI




SEGUN DENUNCIA HACI

### HOMBER TABATA MISHI CU SU HIJASTRA FOR DI SU 7 AÑA

FOR DI APRIL PA JUNI 2023

### CBS TA BAY CONTA NEGOSHI Y FUNDACIONNAN NA ARUBA

### PARLAMENTARIO HULANDES A DUNA MARISOL LOPEZ-TROMP RASON



The #1 Payroll & HRM Software in the Caribbean



- Easy to Use & Always Accurate
- Complete Integration of HRM & Payroll
- 24/7 Support from Local Specialists
- On-premise or Cloud
- All Types & All Sizes of Companies incl. Government

Tel. 583-7072 | [info@vcc-int.com](mailto:info@vcc-int.com) | [www.vcc-int.com](http://www.vcc-int.com)



**VCC**  
International NV

REAL SOFTWARE  
REAL SUPPORT  
[www.vcc-int.com](http://www.vcc-int.com)



Segun denuncia haci

## Homber tabata mishi cu su hijastra for di su 7 año

**D**iabierna ultimo Corte a trata un caso penal contra e homber Yovanny G., kende acusa di a mishi cu e yiu muhe di su pareha, cuminsando for di tempo e mucha aki tabatin 7 año. Durante tratamento di e caso e mama y e victima di 14 año a presenta. E tabata insisti di kier ta presenta den tratamento di e caso, segun su abogado mr. Vito Carlo a splica Corte. Dado momento Hues a pidi pa tur hende bandona sala pa e por papia cu e menor y su mama. E momento ey lo a splica e menor cu e caso lo por tin un efecto hopi grandi riba dje mirando tur loke cu ta bini dilanti pa cual ta prefera pa e keda pafo. Y esey a sosode tambe. Unicamente su mama, kende ta esun cu a haci e denuncia, hunto cu otro familiarnan tabata paden.

Segun e acusacion presenta na fiscal e abuso sexual y actonan di inmoralidad a tuma luga for di 2015, ora cu e mucha tabatin 7 año, te cu 2021. Awendia e menor tin apenas 14 año. Despues di presenta e acusacion, e acusado Yovanny Guillen (32) a bisa Hues cu e acusacion ta totalmente falso. “Nunca mi a mishi cu e mucha. Y tabata imposibel pa mishi cu ne, di e forma cu a describi cu e cosnan lo a tuma luga.”

Na mas cu un ocasion durante tratamento di e caso, el a bisa cu e ta kere cu henter e asunto aki ta manipulacion di parti di mama di e mucha. Esaki pasobra dado momento el a separa di e señora y a bay biba cu un otro persona.

Algun incidente lo a tuma luga ora cu nan tur tabata drumi hunto riba un cama. E acusacion a reacciona bisando cu esaki ta imposibel cu algo por a pasa. E ta bisa cu na e prome cas, e menor tabatin su mesun camber. Na e siguiente cas na inicio nan tur tabata drumi hunto riba un cama. Semper e tabata drumi un banda, su pareha banda di dje, nan yiunan y e menor full na e otro banda. Esaki ta e mama mes a bisa a haci e areglo aki. “Pues mi no tabata drumi cerca di e mucha,” e acusado a bisa.

Tabata e mama cu a descubri loke a pasa, ora cu el a lesa loke su yiu a skirbi den un dagboek di dje. Asina el a lesa con e homber a pone su penis memey di pia di e mucha, of cu el a spierta marduga di e forma ey. Tambe ta menciona cu e homber a pidie mostra su pechonan, a pone mishi cu su penis y hala esaki tambe. A base di e denuncia y di loke ta aparece den e dagboek, funcionarionan di departamento di casonan inmoralidad a combersa cu e menor. E unico cos berdad ta cu nan tabata drumi pa un tempo nan tur hunto riba un cama grandi y cu tin biaha nan tabata nan dos riba cama ora di wak television, pero leu di otro. Despues di un tempo, a cumpra un cama apart pa e mucha muhe.

A mustre riba declaracion di e menor, kende a conta con un biaha el a pidi su padrastro pas’e su serbete, cu tabata momento el a pidi e mucha pa wak su pechonan. Despues a pidie pa tene relacion cu ne. “Nada di esaki no ta berdad.” E unico conclusion cu e por saca ta cu e mama ta esun cu a pone e menor haci tur e cosnan aki door di nan separacion. El a menciona cu ora cu el a bay biba cerca un otro persona e señora a menasa di kita nan yiunan for di dje y e no tabata kier pa e muchanan bay na e cas unda cu e acusado tabata biba. Inclusive, despues di haci denuncia e muhe a mande un potret y a bis’e “awo bo ta bay mira kico lo bay pasa”. P’esey e ta bisa cu tur cos tabata planea. E ta kere cu tur loke ta skirbi den e buki no tabata tempo menciona den e acusacion sino algun dia prome cu e mama a haci e denuncia.

A muestra na e acusado cu un amiga di e menor tambe a declara cu e mucha a wordo abusa. Pero Yovanny a keda nenga cu algo indebido a pasa.

Abogado Carlo cu a representa e victima y su famia a papia di e trauma cu e menor a pasa aden, e tratamento cu e mama a busca pa e mucha y pakico e no a warda pa ora por logra haya cita cu Respaldo. El a pidi pa paga e cuenta aki y tambe a pidi un suma di daño y perhuicio. El a referi den caso di un politico cu a otorga 20 mil florin di compensacion pasobra a yam’e pedofiel. P’esey den e caso aki cu ta un mucha cu durante un periodo largo a wordo abusa, el a pidi 35 mil florin mas 15 mil florin di e otro gastonan pa yega total di 50 mil. Aunke cu casonan di abuso semper ta dificil pa motibo cu no tin testigo di ora e hechonan tuma luga sino mester depende di otro tipo di prueba, steunbewijzen, mirando tur loke cu a bini dilanti, OM ta bisa cu nan ta pidi pa declara e homber culpabel.

Teniendo cuenta cu edad di e victima, e temporada durante cual esaki a tuma luga y otro aspectonan psicologico (for di su 7 año), a dicidi cu un castigo di 66 luna ta na su luga. Banda di esaki a pidi Corte tambe pa bay di acuerdo cu e suma pidi pa daño y perhuicio. Abogado di e acusado a trece dilanti loke su cliente a bisa, esta cu nunca el a mishi cu e menor y no tin prueba di esaki tambe. E acusado a bisa cu tabata trata di un diferencia di opinion entre adultonan cu a conduci na e denuncia falso. Inclusive e acusado a papia despues cu e mama y e mes a bis’e cu no worry cu e denuncia pasobra despues Polisnan mes lo haya sa cu esaki no ta berdad. “Nunca a pasa den mi mente pa haci algo cu ningun mucha,” e acusado a bisa na final.

Hues ta bay studia e caso y dia 24 di maart lo dicta sentencia den e caso.

# KAPEL DI ALTO VISTA TA UN CAS DI ORACION Y NO LUGA DI HACI NEGOSHI

Les di Bijbel a siña nos cu dia cu Hesus di Nazareth a yega ciudad di Jerusalem, el a wordo ricibi cu palma pa ciudadanonan di e luga, caminda el a haci un entrada digno di un Rey. Impresiona pa e ricibimiento aki, alegria di Yiu di Dios no a dura mucho, ya cu asina cu el a yega cerca di e entrada di e tempel santo, El a keda asombra pa cantidad di negoshinan, bendedonan cu a bin pa gana placa den porta di e tempel sagrado.

Para cu man na halto y den bos halto El a grita: “Jerusalem, e ciudad leal, e ciudad pa husticia, a transforma su mes den un cas di p.....”

Seguidamente Hesus a pasa man pa un pida palo y a cuminsa destrui e tentnan, plama placa u y mercancía riba suela, yuda pa apostelnan y ora cu el a caba, el a subi e trapi di entrada dilanti di e tempel Sagrado y a bolbe dirigi su mes na tur presente:

“Esaki ta un cas di oracion pero boso a transforma esaki den un neishi di ladronnan,” pa despues bira y drenta paden caminda pa basta rato el a contempla e luga sagrado aki.

## KAPEL

E historia Biblico aki ta bin na varios ocasion di creyentenan cu ta bishita Kapel di Alto Vista pa reuni un rato den ambiente di Señor, pa alsa nan oracion y busca un acercamento mas cerca cu Señor.

Kapel ta habri su porta for di 6’or di mainta pero den cuestion di corto tempo, pafo ta ser transforma den un tipo di mercado di purga, caminda ta lanta algun tent mescos cu e storia Biblico ariba menciona.

Negoshantenan ta ricibi cantidad di turista cu tambe ta drenta den e Kapel pa haci oracion hunto cu esunnan local, ya cu hopi hende local cu ta sufri di un of otro malestar, ta haci un ‘nobena’ pa gradici pa nan sanacion y hopi ta bay bishita Kapel aki, como gran muestra di gradicimento of pa pidi Señor su bendicion pa nan pasa dor di nan contra-tiempo cu nan salud.

Mayoria di hendenan local pa no bisa tur, ta cende un bela caminda nan ta pidi Hesus, Yiu di Dios, pa ilumina nan caminda cu nan tin cu cana pa supera loke nan tin pero hopi di nan no ta compronde di con ta permiti e falta di respet aki, di un grupo di comerciante cu kier saca probecho di turistanan pa cumpra algo for di nan.

Di tent pa bende coy bebe, di awa di coco pa otro refresco,



otro ta bende snack y otronan mercancía pa corda e luga y tambe tin un cu ta bende bela, cual ta un bunita gesto pero e ta keda di ta un hende cu ta haci negoshi cu Cas di Dios.

Den pasado a yega di vocifera e asunto aki caba, tin keho cu a wordo entrega pa ciudadanonan cu ta kere y ta haya cu mester tin mas respet pa un luga asina cu a wordo inaugura dia 20 di April di 1750, pues aki un luna e Kapel di Alto Vista lo cumpli 273 aña di existencia, pues mas cu un cuarto di siglo, loke tambe ta confirma kico e ta nifica pa creyentenan. Paden por lesa informacion cu el a wordo renoba na 1952, y dia 25 di Mei di 1952, tabata Su Excelencia Monseigneur A. van der Veen Zeppenfeldt y e luga a wordo manteni pa hopi creyente cu ta sinti nan mes c’union special cu e luga santo aki.

## RESPET

E luga religioso aki merece mas respet y no ta cuestion di stop tur e hendenan di gana nan placa of haya un entrada pero autoridadnan tin cu interveni y exigi di e hendenan aki pa no subi e tereno di Kapel, no para dilanti di e luga cu nan negoshi.

Pa colmo riba un borchí di un bendedo, por lesa “canabis” y aki no sa si ta un bebida of ta oferta di cannabis pa turistanan loke ta mas serio ainda.

Al contrario riba e ruta pa bay Kapel tin cantidad di sitio cu nan por staciona nan mes y atende cu turistanan cu ta bay bishita e luga interesante aki pero no mester permiti e falta di respet aki sigui tuma luga.

Hopi hende local ta bay e sitio aki pa sinti nan mes mas cerca di Dios, pa papia cu Señor y sinti e forsa bondadoso di nos Señor y loke a ser haci cu e sitio aki, simplemente ta inaceptabel.



For di april pa juni 2023

# CBS ta bay conta negoshi y fundacionnan na Aruba



Cuminsando dia 14 di april te cu fin di juni 2023 Oficina Central di Estadística lo organisa un Censo Economico 2023, caminda cu lo tin un conteo di tur negoshi y fundacion na Aruba.

Aki lo haci un analisis puntrando e companianan cu ta eherce un actividad economico pa duna entre otro dato relaciona cu nan actividad economico cual ta e producto of servicionan cu nan ta provee, pero tambe cual producto y/of servicio ta forma parti di e gastonan mas grandi pa funcionamiento di e entidad.

Jonathan Upegui di Oficina Central di Estadística, ta splica cu e meta importante ta pa tin un bista di tur e entidadnan fisico activo riba Aruba asina por tin un bista di con e economia di Aruba ta structura.

E ta yuda CBS tambe pa update nan registro di negoshi y p'e departamento di National Accounts mes, ta saca e GDP. P'esey tin cu keda up to date cu e manualnan di Nacionnan Uni. Na 2025 nan lo saca di NSA number di e manual nobo di National Accounts. E censo economico ta hopi importante p'e datonan.

Tambe den e censo ta yuda loke ta yama Supply and use table, pa mira con e economia ta, den e sentido cua t'e sector ta cumpra cierto producto of cumpra cierto servicio. Esey tambe ta yuda p'e censo aki. Por ultimo e ta duna CBS e posibilidad pa duna dato y estadistica n'e entidadnan inter-

nacional.

E censo lo ta ehecuta digitalmente via un tablet. E ora tin diferente encuestador cual lo bishita e entidadnan cu nan ta haya riba nan lista.

Nan ta haci un cita of ta entrevista di biaha. Ta pidi pa e representantenan di e companianan ta esunnan cu sa di e finanzas di e compania.

Upegui ta sigui splica cu pone un punto caminda cu CBS ta para pa privacidad.

E datonan ta uza solamente pa motibo di estadistica. Nunca lo publica nan individualmente, solamente den forma agrega. E datonan nunca lo ta comparti cu ningun otro entidad, sea di sector publico of di sector priva. Solamente e cifranan agrega lo ta publica y lo ta comparti.

## CENSO DI AGRICULTURA

P'e parti di censo di agricultura, e cuestionario tampoco no ta cla por completo, pero por pensa riba pregunta di tipo di tereno y pakico ta haci uzo di e tereno. Tambe ki fuente di awa ta uza, e manera cu ta pisca, si ta na liña of algo. Tambe ki tipo di producto ta cultiva y tambe ta gara, den e caso di pisca.

Pa transparencia lo publica e encuesta por completo riba e website di CBS, den tur cuater idioma.

Segun AWEMainta por a compronde, oficialmente tin registra rond di 50 mil negoshi na KvK. Sinembargo hopi no ta funciona mas. Awor cu e Censo aki lo bay haya un miho idea di e situacion actual.

## Parlamentario Hulandes a duna Marisol Lopez-Tromp rason

**D**urante e siman cu a pasa a tuma luga e Interparlementaire Overleg, IPKO, na hermana isla Corsou, unda cu parlamento di e tres paisnan den Caribe Hulandes, esta Aruba, Corsou y Sint Maarten, hunto cu esun di Hulanda, a reuni. Tabatin varios tema cu a discuti durante e reunion aki, entre otro e asunto di sclavitud, geschillen-regeling, matrimonio di mesun sexo, entre otro y deficit di democracia no a keda sin menciona.

Lider di fraccion di MAS, Marisol Lopez-Tromp a dirigi su mes durante e ultimo dia di e reunion bisando cu e ta sinti toch cu e miembronan di parlamento a bin IPKO cu otro expectativa dependiendo di e topico y e desaroyonan cu a experencia den e ultimo añanan. Tambe loke nan kier cu IPKO y e topiconan y loke cada un kier a aporta. Segun Lopez-Tromp, mirando e ultimo 20 añanan, na principio di IPKO tabata mas den cuadro con e islanan lo bira pais y henter e discusion rond di esaki. Tabatin hopi discusion y pleito, Lopez-Tromp a indica.

Despues a bin un periodo caminda tur e paisnan mester a demostra kico nan por y haci. Despues a bin IPKO cu a bin pa papia di colaboracion y best practices. Despues di esey a bin atrobe un periodo fuera di pandemia unda cu a bin cu CAft, RAft, Cft y a lanta tur tipo di sentimento con cada hende ta para. Despues tabatin e fase con nan ta awo. Fuera di esey e parlamentario ta pensa cu ta importante pa rato rato keda defini kico t'e papel y e meta di IPKO y pa tur sa kico por spera di otro, ya cu den rato rato e ta cambia y dependiendo sin tin miembro nobo of no y esunnan cu ya tin 20 of 25 aña aki t'ey caba y a experencia tur cos.

Tambe e bon y ideanan nobo cu a bin acerca, pero toch a muri ya cu nan no ta mas riba agenda. Loke ta importante ta cu na momento pa traha agenda cu eyan tampoco no tin un deficit di democracia y cu e puntonan cu trece dilanti pa tur e islanan tambe bin riba agenda y no algo cu ta impone cos cu ningun hende no sa di una el a sali y kico t'e intencion, di kico ta papia y kico t'e meta. Segun Lopez-Tromp ta importante p'asina por ta bon prepara riba e discusionnan aki.

Por ultimo Lopez-Tromp a indica locual cu loke a palabra diabierna mainta, no ta bay solamente pa decision of consenso of loke tin a caba di dialoga, pa ta involvi di comienso den e diferente procesonan pa loke ta regarda di e paisnan respectivamente. E miembronan sa sinti cu nan no ta involvi desde comienso por ehempel den ley di consenso

of otro procedura. Esey tambe ta un deficit di democracia. Si bo no ta den e procedura di decision no por participa, a pesar cu tin un of dos representante den conseho di minister di reino, Lopez-Tromp a splica.

Mester trata di un proceso cu por reconoce y despues por propaga y controla, pasobra bo tabata parti di djey y bo a bay di acuerdo y no lucha contra pa despues caba den un forma di discusion y crisis cu e geschillen regeling. Geschillen regeling ta pa ora cos resulta robes for di principio hunto mester ta conecta den e procedura.

Riba e splicacion esaki parlamentario Oomen-Ruijten di Hulanda a comenta indicando cu algun persona a papia cu ne hustamente cu loke Lopez-Tromp a bisa, ta loke mester haci. E ta exactamente e persona cu tabatin e conclusion cu mester tuma di IPKO. Cu esaki t'e ehempel cu e kier a duna cu no por a resolve e transparencia pero por for di e comienso. Pa por cuminsa riba papel, ta haya cu cada gobierno mester ta responsabel na su propio parlamento irespeto e proceso pa logra un reglamento di reino. Esey ta nifica cu na comienso bin cu un informacion y despues bin envolve parlamento. COHO tabata un mal ehempel pa no bay bek den e situacion aki y Lopez-Tromp a indica esey cu tin e sentimento cu bo e conocimiento continuamente mester ta involvi.



**Hunto, bon regla!**

**Guardian Group ta felicita Kooyman cu e continuacion di nan plan di pensioen na Guardian Group Fatum.**

Recientemente Kooyman y Guardian Group Fatum a firma pa extension di e contrato di pensioen colectivo. Cu un pensioen di Guardian Group Fatum e futuro finansiero di e personal di Kooyman ta garantisa.

Gerensia di Kooyman ta reconose e importansia di un bon plan di pensioen. Ademá, pensioen ta un condicion laboral secundario importante pa atrae y mantene bon personal.

Diego Fränkel, CEO di Guardian Group Fatum, ta gradici Kooyman pa e confiansa durante di años y ta contento di por sigui cu e colaboracion plasentero.





### Mirrors Beauty Academy ta ofrece e siguiente serviccionan

Laba  
Corta  
Blowdry  
Keratina  
Cold Wax

Tinja  
Highlights / Mechitas  
Ombre / Californiana  
Bayalage  
Peinado

Makeup  
Threading  
Barberia  
Manicure  
Pedicure

Y  
mucho  
mas!

Tel. Alejandro: 564-4412 of 582-0110 • Whatsapp: 732-0110 of 566-0110 • Adres: Ponton 76 - Suite #3

### 'Turning the Tide'

## Parke Nacional Aruba cu proyecto pa restauracion di coral y mangel na Aruba

**D**iabierna ultimo a tuma luga lansamento oficial di e proyecto riba iniciativa di Parke Nacional Arikok yama 'Turning the Tide', cu ta un proyecto den colaboracion cu partner di Aruba y Hulanda, pa restauracion di coral y mangrovenan di Aruba.

Ir. Rene Henkens, di Wageningen Environmental Research a indica cu e situacion ta alarmante. E rol den e crisis global di diversidad, door di deforestacion, piscamento di mas, contaminacion, cambio climatico den e ultimo temponan a bira pio. E region Caribense no ta un excepcion. Den un informe di WWF a conclui cu e crisis di biodiversidad den Latino America y Caribe ta un di e preocupacionnan mas grandi na nivel mundial. Nobenticuater por ciento di e biodiversidad a bay atras entre 1970-2018. Esaki ta serio, e ingeniero a enfatisa.

Hulanda tambe a informa di e biodiversidad den Caribe y e seis islanan den Caribe. E conclusion di e ultimo Convention Biology Diversity Report a hasta menciona cu naturalesa den Caribe Hulandes no ta suficiente y pa algun di e islanan, manera Aruba, ta den decadencia. Esaki ta ilustra tambe cu e informe di CARMABI cu e rifnan di coral di berdad ta den un estado critico.

Pregunta ta e ora, aunke cu bo no ta mucho den naturalesa, kico esaki nifica? E ta un situacion di emergencia, ya cu e por tin su efecto riba e bienestar di e comunidad Arubano. Tabata tin varios estudio haci for di 2018, cu a conclui cu e presion riba e sector di pesca y di turismo, cu si e decadencia den biodiversidad continua, e bienestar economico di Aruba, tambe lo baha cu 50%. P'esey ta importante pa cuminsa haci algo riba e situacion aki, 'Turn the Tide, cual t'e nomber tambe di e proyecto aki,' Henkens a splica.

E proyecto aki ta pa bay restaura e biodiversidad y e ecosistemanan marino na Aruba cu ta degrada. Ta bay haci esaki door di wak e coralnan y e mangelnan, segun e research & conservation manager, Giancarlo Nunes.

Cu e coralnan lo bay traha riba coral artificial y cu e mangelnan ta bay haci diferente accion pa drecha e calidad di awa y e polucion cu ta drenta fo'i tera den e mangelnan. Esaki ta hopi importante pa traha riba diferente parti di lama, manera e mangel y e



coralnan. Tur e sistemanan aki ta conecta cu otro.

Mangel tin un habitat super importante segun Senior Scientist Dolfi Debrot, di Wageningen University and Research.

E ta sigui splica cu e ta sirbi particularmente como fuente di cautiverio di pisca. E ta un luga caminda e pisca chikitonan ta haya proteccion y cuminda p'asina nan por crece bira grandi prome cu nan bay bek riba e rif p'e turista por mira nan y p'e piscado por coy nan.

Tambe mangel tin un rol hopi grandi den proteccion di costa. Den pasado prome cu colonisacion na Aruba semper tabatin hopi mas mangel. Pero aworaki pocopoco nan ta bayendo perdi.

Na Aruba masha hopi mangel a wordo perdi di e forma aki, pasobra den pasado nan no tabata realisa e importancia di e matanan aki.

Fundacion Parke Nacional Aruba ya caba ta den un proceso di stakeholder engagement pa organisa un marine park management plan p'e areanan protehi den lama, segun Sietske van der Wal, Interim Park Manager.

E management plan lo finalisa fin di e luna aki pa un draft version pa validacion di nan stakeholdernan pa en berdad valida si locual nan a trece dilanti ta incorpora den e plan aki. E ora ey mientras cu ta den e proceso ey di finalisa esey, pa aplicacion pa un proyecto, ya caba FPNA a tene cuenta cu deseo di e stakeholdernan den aplicacion di e proyecto aki.

E stakeholdernan a identifica diferente punto di enfoko "conservation target" cu mester pone enfoko riba dje.

E top tres tabata coral ecosystems, reef fish y mangrove ecosystem. P'esey e proyecto aki ta incorpora tur tres di eseynan den e proyecto aki.



## Fraccion di AVP ta entrega un recordatorio pa convoca un reunion publico tocante aumento drastico di costo di bida

Lider di Fraccion di AVP den Parlamento, mr. Mike Eman a haci entrega di un recordatorio na presidente di Parlamento di Aruba encuanto e peticion pa un Reunion Publico tocante e subida alarmante di costo di bida pa nos ciudadanonan. E ta conoci cu prijs pa necesidadnan basico a aumento bao maneho di Gabinete Wever-Croes. E gasto nan di utilidad a aumento cu 23% mientras cu gasto di gasolin ta conoce aumento continuamente. Adicionalmente Gabinete Wever-Croes a castiga nos comunidad cu un aumento di impuesto cu a percura cu prijs nan di servicio y produccion ta bira hopi mas caro y impagabel pa nos ciudadanonan. Ademá a wordo anuncia cu lo aumenta schoolgeld cu ta causando hopi preocupacion den nos hogarnan.

Lider di Fraccion AVP mr. Mike Eman ta splica cu “; schoolgeld lo conoce un aumento preocupante schoolgeld pa Kleuterschool lo aumenta di 175 pa 200 florin, Basisschool lo aumenta di 175 pa 275 florin y schoolgeld di alumnonan di Mavo lo aumenta di 250 pa 350 florin. Un famia cu tres yiu lo confronta na mes cu un aumento di 600 florin na gasto di schoolgeld adicional causando un preocupacion financiero grandi den nos comunidad”

Lider di Fraccion di AVP, mr. Mike Eman a expresa e urgencia di e situacion “nos comunidad tin hopi dificultad pa tin un sobrevivencia husto, ta for di Augustus di aña pasa nos a haci un apelacion pa convoca un Reunion Publico pa den Parlamento di Aruba nos por atende cu e preocupacion urgente di nos comunidad cu ta e aumento dramático di costo di bida”.

E ta lamentabel cu presidente di Parlamento di Aruba NO duna prioridad na atende cu e dolornan eminente den nos comunidad. Presidente di Parlamento kisas riba instruccion di Gabinete Wever-Croes ta duna prioridad na tur otro tema menos na e sufrimento di nos comunidad. Fraccion di AVP ta sigui insisti pa convoca un Reunion Publico pa asina Gabinete Wever-Croes por bin responsabilisa su mes na Parlamento di Aruba encuanto su maneho di medida. Lider di Fraccion di AVP, mr. Mike Eman a subraya cu na

varios oportunidad Fraccion di AVP a subraya e ausencia di un maneho di alivio, cu ta contene con ta bay mitiga e efecto nan di e aumentonan dramático aki pa nos comunidad. Fraccion di AVP a intenta pa cambia e rumbo di Gabinete Wever-Croes na varios ocasion. Na april 2022 durante e proceso di tratamiento di lei di presupuesto 2022 Fraccion di AVP a entrega un Amienda den cual ta muestra cu por re-aloca e fondonan pa alivia esnan cu tin’e mas difícil den nos comunidad. Cu e Amienda proponi pa Fracion di AVP lo a evita cu lo a corta den cuida medico y lo a evita cu awe esnan enfermo mester paga pa remedi. E Amienda lo duna tambe un alivio pa esnan cu ta cobra bijstand y lo introduci un bijstand special pa hobennan bou di 16 aña cu tin un limitacion cognitivo of fisico. Lastimamente Parlamentarionan cu ta sostiene coalicion MEP-RAIZ a vota contra e Amienda di Fracion di AVP.

Na December durante tratamiento di lei di aumento di BBO, un biaha mas Fraccion di AVP a muestra Gabinete Wever-Croes ariba e consecuencianan devastador pa nos hogarnan aki na Aruba. Conforme cifra na di CBS mas cu 50 000 ciudadano ta biba abao di locual ta necesario pa sobrevivi y mas medida lo alimenta e pobreza den nos Pais. Fracion di AVP a propone un amienda pa intenta pa cambia e maneho di Gabinete Wever-Croes, pero lastimamente no a haya e sosten. Nos comunidad ta indigna cu mientras cu Gabinete Wever-Croes ta continua cu su maneho di enriquece y faborece esnan cu ta na famia y amistad, e comunidad aki ta sufri.

Lider di Fraccion di AVP, mr. Mike Eman ta haci un apelacion urgente pa yama e reunion publico pa asina por debati ariba e aumento continuo di costo di bida cu tin nos ciudadanonan sofoca. Fraccion di AVP a demostra den oposicion pero tambe den gobernacion (reparatietoeslag, schoolkindertoeslag, aumento di bijstand etc) , cu si bo tin curason pa e comunidad bo por trece alivio pa e comunidad. E ta posibel pa para e desaroyo negativo actual y cambia e rumbo di nos Pais. Lider di Fraccion di AVP , mr Mike Eman a clausura bisando: “Si bo ta sirbi e bon comun y tin e boluntad e ta posibel pa brinda e comunidad e alivio cu na ta anhela”

PAN BATI, SCABECHI, SEAFOOD SALAD, SULZ, SANGER YENA, CONCOMBER OF PAPAYA STOBA, SANCOCHO, AWA DI PLAYA, QUESILLO, PANBOYO, BOLO PRETO AND MUCH MORE!

**AUTHENTIC ARUBAN & CARIBBEAN BUFFET**

**Elements RESTAURANT**

LOCATED AT BUCUTI & TARA BEACH RESORT

**RESERVATIONS REQUIRED**

elementsaruba.com | +297 592 5868

ADULTS ONLY | CASHLESS | NO SMOKING | NO GROUPS

**\$24.50**

SERVICE CHARGE INCLUDED



Benny Sevinger:

# Qredits y compinchi Briesen ta mas importante cu e enseñansa di nos muchanan

**E** siman aki a bolbe demostra cu Evelyn Wever-Croes bo no por gar'e ta papia un berdad, segun Benny Sevinger. E parlamentario di Partido di Pueblo Arubano a bin dilanti e siman y for di dilanti di sede di SKOA a scual e minister president y su gobierno formalmente pa e manera con ta maneando e pais caminda ta haciendo e bida di e ciudadano cada bes mas dificil.

Sevinger ta considera un berguensa cu MEP tin mas di cinco año den gobierno y tur año e schoolgeld a keda subi; y e biaha aki drasticamente. Na su opinion, Evelyn Wever-Croes a gaña SKOA, gaña docente y el a gaña mayornan y pueblo en general. A pesar di tanto biaha cu a discuti den parlamento e situacion di werksternan, gobierno ta nenga di paga nan un salario husto y ta nenga di SKOA tambe un exoneration (kwijschelding) di nan debe di belasting. Esey ta obliga e fundacion pa crea mas y mas debe; especificamente un deficit di mey milyon florin anual. Consecuentemente SKOA mester aumenta e schoolgeld pa genera e entrada cu e tin mester pa sigui funciona.

Dia cu a pidi den parlamento pa pordona debe di SKOA na belasting, contrincantenan politico a bisa cu esey ta contra ley. Sin embargo siman pasa a pasa un ley pa duna Qredits placa, un entidad priva cu ta fia na ciudadano pa lanta negoshi chikito; siendo cu ora nan paga esaki bek, Qredits no ta debolbe e placa na gobierno. Mod'i bisa: Pa Qredits si por, pero pa SKOA no por. Si esey no ta suficiente, pronto Gabinete Wever-Croes II kier bin cu un ley Parlamento pa pordona debe di mas cu 2 milyon florin cu ex minister Eddie Briesen a crea pa Pais Aruba, a raiz di un contracto cu a cera hopi año atras cu un compania di afo pa un festival di musica. Kier men cu pa libra hende di partido di nan responsabilidad si tin placa, pero pa e muchanan cu ta bay scol di SKOA no tin placa.

Sevinger ta corda ainda con, cu orguyo ex minister Lampe di Gabinete Wever-Croes I a bisa cu e ta esun cu a corta 25 milyon den enseñansa, e area cu hustamente no mester a corta aden. Te di awe ta mira no ta corta cu gobierno ta ni purba corta den biahamento, tampoco ta corta den auto caro cu ta core aden, ni den gasto di personal pa friends & family.

Dos dia prome cu eleccion, Sevinger a declara na prensa, Evelyn Wever-Croes a sinta cu SKOA y bisa nan pa no kita



ningun hende paso e lo drecha e situacion. “Esey tabata dos año pasa. Awe awa y coriente a subi, gasolin a subi, bo mes tin cu paga pa bo remedi, servicio di sushi a subi. Pueblo no tin mas placa, pero gobierno no ta worry cu nada di esey.”

E parlamentario ta segura cu e problema tin solucion, pero bo mester tin gana di papia cu bo parlamentarionan si. “Awe nos ta para dilanti di SKOA pa nan sa cu AVP si ta duna nan sosten na nos enseñansa, nos muchanan, nos maestronan, nos werksternan. Nos tin cu para como pueblo pa e hendenan aki cu ta traha dia pa dia for di un gobierno cu ta core den auto di 150 mil florin, cu ta biaha tur dia, milyon ta bay pa papa, milyon ta bay pa friends & family pero no por pone placa pa SKOA. Ta opta pa bay cob'e atrobe for di saco di e pueblo.”

E exigencia di AVP na Gabinete Wever-Croes II ta pa aloca e suma necesario pa SKOA, pa yega na un acuerdo con ta exonera of yuda paga e debe di belasting y pa bin parlamento pa cambia ley. No por bin cu e excuus mas cu no tin placa presupuesto, pasobra a aumenta e post di goederen en diensten cu 60 milyon florin pa sigui regala na friends & family, asina Sevinger a finalisa bisando.

## FACEBOOK:

Atrobe ta gara prome minister den un mentira fragante. Despues di a priminti di elimina schoolgeld, ta prefera di duna Qredits y amigo y sospechoso di husticia Eddie Briesen placa, na luga di aloca esaki pa e scolnan di SKOA.

## INSTAGRAM:

Pa duna Qredits y Briesen si gobierno tin placa, pero pa e scolnan di SKOA y pa enseñansa no tin.



drs. Mervin Wyatt-Ras:

## Evelyn Wever-Croes a firma prome cos cu Hulanda a pone su dilanti sin boga pa necesidad di pueblo

**N**a clausura di e Interparlementaire Koninkrijksoverleg (IPKO) cu a tuma luga e siman aki na Corsou, lamentablemente e parlamentario di AVP, hunto cu esun di otro pais den Caribe Hulandes, mester constata cu e reforma den Landspakket, leu di beneficia comunidad, ta ignora loke mas ta afectando nan: pobreza, empleo y nos clima. A yega na e conclusion cu gobierno di Aruba no ta informando parlamento manera mester ta, ni siki- era su mesun fraccionnan di coalicion.

Ta p'esey un Shaliny Tromp-Lee di fraccion MEP ta hay'e ta pidi transparencia for di e Secretario di Estado di Hulanda, pasobra e no ta hay'e for di su mesun prome minister y lider di partido.

"Eynan bo ta mira un gobierno dictatorial, un Evelyn Wever-Croes cu ta firma ki papel cu e haya sin informa pueblo mi su propio hendenan. Unda cu e wak un papel e ta firma," asina Wyatt-Ras a declara.

El a purba di haci mesun cos cu COHO, sin embargo parlamento a demostra energicamente cu no ta acepta esey y mester respeta nos autonomia. Asina mes, el a hinca Aruba den e convenio aki di landspakket. Wyatt-Ras: "Ta bay haya reforma cu ta impone riba nos pueblo, cu ta trece medida cu ne y ta empobrece nos pueblo tanto riba tereno social, pero tambe salud publico."

Pa e parlamentario ta simplemente inhusto cu nos hendenan tin cu paga pa nan medicina y esey ta djis un refleho cu gobierno no ta sinti pa su pueblo.

Na fin di dia AVP a haya rason ora cu a bisa cu e landspakket no ta na beneficio di nos hendenan.

"Door di e gobierno descabeya aki, sin pia sin cabes y sin vision, mentiroso, cu no ta informa parlamento, nos tin cu bay bek na cas y haci huiswerk pa sali na defensa di e bienestar di nos comunidad Arubano.



**APPAREL**

**BOAT ACCESSORIES**

**TODOMAR**

f TodomarAruba @TodomarAruba TodomarAruba +297 585 0555

**FISHING TACKLE**

**FIBERGLASS PRODUCTS**



Parlamentario Shailiny Tromp-Lee den su disertacion na IPKO Curaçao:

## Apesar di hopi reto, Aruba ta traha hopi duro pa cumpli cu e exigencianan di Hulanda

**D**iamars 28 di februari parlamentario Shailiny Tromp-Lee tawata tin e oportunidad pa hiba un discurso cortico durante e reunion di IPKO. Parlamentario Tromp-Lee a habri su discurso riba e tema di COHO y RAft na unda Tromp-Lee a haci un peticion na tur presente pa ban bek na mesa di reunion, y yega na un areglo di RAft teniendo cuenta cu e mesun argumentonan pakico COHO no ta riba mesa mas awe.

Parlamentario Tromp-Lee a sigui su discurso riba e retonan cu Aruba ta confrontando na e momentonan aki. Na banda cu Aruba mester stimula e crecimiento economico, tambe mester inverti den e ehecucion di landspakket y mester mik cada bes pa logra e normanan financiero, cu a keda stipula pre-COVID, cu Hulanda ta exige aun despues di a pasa den un pandemia. Apesar di e reto grandinan aki Gobierno di Aruba a logra entrega e Presupuesto di Pais Aruba pa aña 2023 na tempo y a wordo aproba pa Parlamento di Aruba dia 14 november 2022 cu un surplus di Afl. 63 miyon, cu ta 1% di e BNP.

Tromp-Lee a bolbe enfatisa cu e pandemia a stroba Aruba di logra un finanzas publico sostenibel y cu poco poco nos ta na caminda pa logra esaki atrobe. Pa por logra esaki tin algun solucion cu por trece alivio pa pais Aruba y un di esaki ta e interes di nos debenan actual. Aruba no a ricibi ningun tipo di saneamento (parcial) di debe y si nos por ricibi esaki lo bay yuda nos enormemente. Un otro alivio riba nos situacion financiero ta si Hulanda refinancia nos debenan di pasado na un interes abou. Recientemente, Gobierno di Aruba a informa cu na comienso di maart lo cuminsa trata e tema di refinanciamento. Parlamentario Tromp-Lee ta spera cu Hulanda ta habri pa duna Aruba saneamento (parcial) di debe of pa refinancia nos debe na un interes mas abou posibel y cu un areglo di pago mas largo cu ta posibel.

Parlamentario Tromp-Lee a finalisa cu apesar tin preocupacion grandi riba Aruba su situacion financiero actual, tin algun desaroyo positivo cu no por keda sin menciona. Un di esaki nan ta cu Aruba su turismo de aña 2022 a crece y supera aña 2019 cu tabata e aña mas miho di turismo pa Aruba. Aruba a cera cu un recuperacion di 98% na 2022 compara cu 2019 y ta proyecta cu e aña aki nos economia lo yega na e nivel pre-COVID.

Un otro desaroyo positivo na Aruba ta cu Gobierno ta trahando duro pa sigui diversifica nos economia riba e tereno



di energia. Gobierno di Aruba tin plannan grandi pa haci e cambio pa hydrogen. Varios otro reforma ta tumando y lo tuma lugar cu tambe lo yuda nos economia, entre otro reforma nan pa mehora entre otro e clima di empresa y di inversion na Aruba y reforma di nos sistema di impuesto. Tin varios otro plannan di reforma cu tambe tin prioridad pa Aruba y Gobierno ta comprometi pa ehecuta nan pero loke ta keda un desafio grandi ta e capacidad y recursonan limita.

Apesar di tur e retonan cu nos pais a enfrenta y ta enfrentando, nos por wak cu tin un maneho responsabel unda cu nos a sa di cumpli cu e exigencianan di Hulanda. Nos ta spera cu Hulanda por reconoce e maneho responsabel di parti di Gabinete Wever-Croes y por reconsidera e saneamento (parcial) di debe of un interes mas abou di nos debenan.

**AWE Mainta**

**CLICK AKI PA MANDA BO  
OPINION OF COMENTARIO**

**OF E-MAIL NA [NOTICIA@AWEMAINTA.COM](mailto:NOTICIA@AWEMAINTA.COM)**




# Boksmento cu detencion riba caminda di Montaña



**D**iadomingo den careda di 3'or y 10 di atardi, riba e caminda di Montaña, presencia di polis a wordo pidi pa un boksmento, un auto maneha pa un homber a kibra un palo di luz y un pida muraya di un cura. E chauffeur no tabata herida pero si tabata musta bou influencia.

Na yegada en berdad polis a bin cu e Nissan March pega contra un pida cura di un compleho di apartamento, na e sitio nan a bin compronde cu e chauffeur di e Nissan March pa motibo di lo tabata bou influencia a baha caminda cu su auto dal contra un palo di luz y despues a bay dal contra e cura di un compleho di apartamento. Mirando cu e chauffeur tabata basta bou influencia a pidi pa presencia di un transportwagen y alcohol ensor. Despues cu polis a haci test di alcohol cu e chauffeur a dicidi di detene e chauffeur y transporte cu transportwagen di polis pa warda di polis na Shaba.

Elmar tambe a wordo notifica pa asina haci e trabounan necesario na e palo di luz cu a wordo kibra.





## Muhe burachi tras di stuur deteni despues di boksmento

**D**iadomingo merdia rond di 12:45 polis a bay altura di un supermercado na Bubali. Lo tawata trata di un boksmento. Aunke cu no tawata trata di un boksmento grandi, personal di e compania di seguro a nota cu un di e chauffeurnan ta bou di influencia y ta su deber avisa autoridad.

Polis na su yegada y tawata asina obvio e dama chauffeur tawata hopi burachi y a sigui e protocol pa lage supla. A uza Alco-Sensor y e muhe a surpasa e limite.

Ey mes nan a bisa su derecho y mester a yude subi transportwagen, debi cu casi e no por a para mes ariba su mesun forsa. Asina nos ta mira cu no ta importa e ora di dia, cu chauffeurnan ta bebe y subi tras di stuur cu tur e consecuencianan negativo, tanto pa nan mes y pa hende inocente.

Daño material e biaha aki tawata minimal.



## Candela di mondi grandi na Moko tawata menasa casnan na Moko



**D**iasabra anochi den careda di 11'or por a mira Brandweer cu urgencia bayendo den direccion di Catiri pa Moko. Di leu por a mira e color oraño y alabes huma. Ta asina cu un candela di mondi tawata menasa algun cas y tambe un Carpenter shop.

E unidad di Brandweer por a wordo mira bayendo nort den Moko cu velocidad halto y ta bira altura di scol di Kudawecha bay patras di dje unda e candela ta. Eynan a truck a cuminsa combati e candela grandi, y despues O.V.D a yega. Despues di basta rato a bin logra domina e candela cu tawata keda move door di e biento duro na e momento ey.



# DMH a presenta na Minister Tjon e plannan pa futuro hunto cu LVAK



**D**espues di 1 siman trahando intensivamente riba contenido di un centro di experticio, sra. Tea Hol di Landelijk Vakgroep Aandachtsfunctionarissen Huiselijk Geweld en Kindermishandeling (LVAK) hunto cu Stan van Haaren di UNICEF Nederland y Sue Ann Ras, beleidsmedewerker ministerio di Husticia y Asuntonan Social a haci un bishita informativo na Minister Tjon. E meta di e bishita tabata pa presenta minister di e iniciativa pa crea un centro di experticio digital como sosten profesional na e Supervisoran di Codigo di Proteccion como e Trainers di Codigo di Proteccion.

## Centro di Experticio Digital

E centro di experticio digital aki tin como meta pa salvaguardia Codigo di Proteccion mediante e profesionalisacion di e Supervisoran y Trainers di Codigo. Tambe e centro di experticio aki lo desaroya material cu lo fungi como material di sosten den e implementacion, integra y hancra Codigo di Proteccion.

Minister Tjon ta aplaudi y ta hopi interesa den e iniciativa aki y ta confirma e importancia pa Aruba tin responsabilisacion di e forma con ta anda cu abuso di mucha y e profesionalisacion di e profesionalnan, manera e Supervisoran di Codigo. Un centro di experticio asina ta contribui enormemente, ya cu e Trainers di Aruba ta conecta akinan y e conocimiento y informacion relaciona cu e forma con ta anda cu abuso di mucha, lo ta disponibel na e Supervisoran di Codigo.

E Supervisoran di Codigo lo uza e informacionnan aki, na momento cu nan mester brinda sosten profesional na nan coleganan, na momento cu nan tin sospecho di abuso di mucha y cu mester uza e 5 pasonan di Codigo di Proteccion.



## Plataforma Supervisor di Codigo y Trainers

Tambe tin e intencion pa desaroya un plataforma, unda e Supervisoran di Codigo ta bira miembro y cu nan por haci uzo di e posibilidadnan di profesionalisacion y e facilidnan di e centro di experticio digital aki, un estilo di LVAK na Hulanda. A dialoga tambe cu Augeo Foundation, cu sigur ta interesa pa aporta na contenido di e centro di experticio digital aki. Tur e colaboracion aki ta realisabel, danki na e trabounan bon haci cu implementacion di Codigo di Proteccion y con ta percurando pa dun'e continuidad y structura duradero y sostenibel, pa traha na proteccion di nos muchanan. E centro di experticio digital aki lo ta resorta bou di Departamento di Mucha y Hoben (DMH).



# Prome Minister Evelyn Wever-Croes lo ta presente na conferencia di hende muhe na Nacionnan Uni

**N**a New York y na Nacionnan Uni ta bay tuma luga conferencia riba e tema di Hende Muhe cu ta e di “67th Commission States of Women”. Cada aña Nacionnan Uni ta trece tur e delegadonan e miembronan e ministernan encarga y presidente di diferente pais hunto.

Durante e conferencia lo trata e tema di hende muhe, e posicion di hende muhe y unda e hende muhe mester haya mas empuhe pa logra kibra desigualdad entre hende muhe y hende homber. Den e conferencia lo mira kico mester haci pa garantisar pa den futuro e hende muhenan por keda ocupa posicionnan clave tur caminda.

Den un declaracion di Prome Minister Sra. Evelyn Wever Croes, e ta haya cu ta necesario pa tin representacion di hende muhe tur caminda specialmente na posicionnan unda ta tuma decisionnan importante di un pais, pasobra ta asina so ta tene cuenta cu loke ta derecho y necesidad di hende muhe. Nacionnan Uni tur aña ta haci e conferencia aki y Prome Minister Sra. Evelyn Wever Croes e siman aki lo ta na Nacionnan Uni pa atende e conferencia y representa Reino Hulandes.

Durante e conferencia ta bay tin un debate general den e sala grandi di Nacionnan Uni unda Prome Minister lo participa y



tambe lo tin loke ta yama Ministerial Roundtables cu participacion tambe di nos Prome Minister Sra. Evelyn Wever Croes. Durante e conferencianan lo trece padilanti e avancen cu tin riba e tereno y derecho di hende muhe aki na Aruba. Algo hopi importante cu Minister Presidente lo hiba cu ne na e conferencia, ta musta kico Aruba ta haciendo pa promove e mucha muhenan e hoben femenino cu tambe por haya oportunidad igual. No ta un secreto kico a logra den e mandatario su generacion y esey ta danki na e trabou duro di esunnan prome cune cu a hacie y awor mester sigui cu e trabou duro ey di crea oportunidadnan pa Aruba su mucha muhe y pa e hobennan tin participacion aki na Aruba. E reunionnan lo ta hopi interesante, y e tema di Aruba lo ser trata. Tambe lo trece dilanti kico Reino Hulandes ta haciendo riba e tereno aki.

## Workshop di mosaic en conexion cu Dia Internacional di Hende Muhe



**D**iamars 7 di maart e artistanan local Merveline y Mike Geerman ta organisa un workshop di mosaic en conexion cu Dia Internacional di Hende Muhe den e Hardin di Shoco na Savaneta 91. E mensahe di e workshop aki ta pa stimula y apoya hende muhe pa libera nan mente y habri e bentana di oportunidad pa nan mes. Sea bo ta un hende muhe den un relacion cu no ta beneficia bo of bo ta haci un trabou cu no ta duna bo satisfaccion, semper tin manera pa trece cambio den esaki.

E artistanan local a selecta un bentana como diseño, simbolizando e bentana di oportunidad. E participantenan ta traha e biaha aki no solamente cu tegels pero tambe cu loke ta conoci como natuursteen. Lo bay tin diferente sorto natuursteen disponibel pa traha cu ne.

Orario di e workshop ta 18:00-21:00. Pa por registra tuma contacto cu e team organisatorio via 5934821 of 5667488. Prijs ta AWG 75 y ta inclui material y refreshment.

Pa mas informacion tocante e actividad creativo di e artistanan local, por lesa mas riba e facebook pagina “Pariba di Brug”.



En conexión cu Dia Internacional di Hende Muhe:

## Prome Minister a reuni cu varios hoben mucha muhe di scolnan secundario na Culture Café



**D** en cuadro di Dia Internacional di Hende Muhe, Prome Minister Señora Evelyn Wever-Croes recientemente a reuni na Culture Café, San Nicolas cu algun hoben cu ta bay scolnan secundario. Prome Minister a expresa cu e encuentro aki sinceramente tabata uno ‘super super’ bunita cu presencia di algun estudiante mucha muhe di Colegio San Augustin, Filomena College, Abraham de Veer, Colegio Nigel Matthew y EPB. Durante e encuentro a intercambia riba diferente tema relaciona specialmente cu ta trata hende muhe.

E aña aki e tema di Dia Internacional di Hende Muhe ta “Empoderamento di hende muhe a traves di innovacion y di digitalisacion” y ta hopi importante pa sa con e muchanan muhe ta pensa riba e topico aki. Esaki tawata tambe e tema principal di e charla. Pero tambe a papia riba otro tema y retonan cu hende muhe ta encontra.

### ALUMNONAN CONTENTO CU E ENCUENTRO CU PROME MINISTER

Na final di e encuentro, alumnonan cu a participa a keda hopi contento y satisfecho cu e encuentro cu Prome Minister y a expresa di a haya e encuentro uno hopi leuk y un experiencia hopi ‘nice’ unda cu a siña hopi cos tocante Dia di Hende Muhe. Alumnonan a keda contento di a haya e oportunidad pa papia cu Prome Minister. Alumnonan a considera e luga un ‘safe place’ na unda cu nan por a expresa y comparti nan sentimento y pensamiento cu Prome Minister.

“E atardi tabata hopi inspirativo pasobra e hobennan ta hopi bon prepara y sa kico nan kier. Tambe nan ta reconoce e importancia di tipo di encuentronan asina y esaki sigur lo no ta e ultimo. Mi ta gradici cabesantenan cu a coopera cu e encuentro aki.

Tambe mi ta gradici e hobennan cu a bin y e mayornan cu tambe a coopera pa esaki bira realidad. Mi lo hiba e encuentro aki como un bunita recuerdo y lo traha riba algun punto hopi importante cu a wordo treci den bienestar di e hobennan”, Prome Minister a expresa.





## Dos detencion relaciona cu atraco



**WILLEMSTAD** - Continuando cu un investigacion relaciona cu dos caso di atraco cu a tuma lugha dia 26 y 28 di februari 2023 den area di Penstraat, polis a haci dos detencion mas.

Diabierna 3 di maart 2023, den oranan trempan di mainta team di Aresto a haci dos detencion

den area di Stenen Coraal y Bonamweg di e sospechosonan, A.D.R.P., di 18 aña y A.O.P., di 28 aña di edad, tur dos nace na Colombia. Despues di e detencionnan team di Atraco a tene dos entrada hudicial na e adresnan ariba menciona.

Durante di e entrada hudicial a haya y confisca articulonan di importancia pa e investigacion. A presenta e sospechosonan dilanti un fiscal auxilia cu despues di interrogacion a ordena nan encarcelamento pendiente di mas investigacion.

## Detencion relaciona cu atraco

**WILLEMSTAD** - Continuando cu un investigacion relaciona cu un caso di atraco cu a tuma lugha dia 13 di januari 2023, riba Jan Noordynweg polis a haci un detencion. Diasabra 4 di maart 2023, alrededor di 06.00'or di mainta team di Aresto a haci detencion di un sospechoso A.W.F., di 17 aña di edad nace na Haiti den area di Stenen Coraal. Despues di e detencion team di Atraco a tene un entrada hudicial na e adres ariba menciona. Durante di e entrada hudicial a haya y confisca articulonan di importancia pa e investigacion. A presenta e sospechoso dilanti un fiscal auxilia cu despues di interrogacion a ordena nan encarcelamento pendiente di mas investigacion.



## Cas na candela

**WILLEMSTAD** - Diasabra 4 di maart 2023 alrededor di 02.45'or di marduga, Central di Polis a ricibi notificacion cu tin un cas inhabita den Fatimaweg ta na candela. Na yegada di e unidad policial, nan a constata cu e cas ta na candela. Brandweer cu a yega rapido na e sitio a logra paga e candela y no por evita cu e cas a kima completo. E motibo di e candela ta den investigacion.

## Un detencion relaciona cu encubrimiento

**WILLEMSTAD** - Continuando cu un investigacion relaciona cu un caso di atraco cu a tuma lugha dia 28 di februari 2023, den area di Penstraat, team di Atraco a haci un detencion.

Diabierna 3 di maart 2023, alrededor di 08.45or di mainta team di Atraco a haci detencion di un sospechoso mas den area di Cherokeezenweg.

### Ta trata di:

- un homber sospechoso D.F.C., di 41 aña di edad nace na Colombia.

Durante di e detencion team di Atraco a tene un entrada hudicial y haya y confisca articulonan cu ta procedente di e ladroncia ariba menciona.

A presenta e sospechoso dilanti un fiscal auxilia cu despues di interrogacion a ordena su nan libertad pendiente di mas investigacion.

### Otro caso

Continuando cu un investigacion relaciona cu un caso di atraco cu a tuma lugha dia 28 di februari 2023, den area di Penstraat, team di Atraco a haci un detencion mas.

Diabierna 3 di maart 2023, alrededor di 10.10or di mainta team di Atraco a haci detencion di un sospechoso na warda di Recherche.

### Ta trata di:

- un homber sospechoso R.A.P., di 40 aña di edad nace na India.

A presenta e sospechoso dilanti un fiscal auxilia cu despues di interrogacion a ordena su nan libertad pendiente di mas investigacion.



*Fortaleza Pa Famia*

# Huy, aleha, y core for di idolatria

**PA** tur esnan cu no tabata sa, of esnan cu sa, pero no kier admiti cu tin idolatria den nan bida, idolatria ta nifica tur locual bo ta aprecia of stima mas cu Dios den bo bida. Idolatria no ta solamente imagennan di piedra, hero, of palo, pero por ta placa, un persona, posicion, trabao, cas, auto, prenda, cuminda of organisacion cu bo ta stima mas cu Dios.

Hende idolatra no ta balora Dios, tampoco adora Dios manera mester ta, nan ta entrega nan alabansa na obhetonan di piedra, palo, brons, glas, den cual no tin bida, tampoco tin salvacion (Exodo 20:1-6 y Salmo 115:5-8).

Un idolo den bo mente ta mesun ofensivo pa Dios cu un idolo den bo man. Idolatria ta haci hende mentiroso, y ciego pasobra nan ta gaña nan mes te hasta nan ta cuminsa kere nan mes mentira y nan no kier mira e berdad.

Idolatria y bruheria ta biba den mesun caya (Galationan 5:19-21).

Ningun hende por sirbi dos maestro (Mateo 6:24).

Yiu chikitonan warda boso di idolonan (1 Juan 5:21).

Si di berdad Cristo Hesus ta den nos bida anto nos no por permanece den idolatria, pasobra Cristo Hesus ta E ta e porta (Juan 10:9) di salvacion pa nos tur.

Idolatria ta Adulterio Spiritual (Ezekiel capitulo 16 y e buki di Oseas).

Dios a entrega su Yiu kende a derama Su sanger precioso pa nos redencion y muri na cruz pa nos picanan. Ningun idolo no a muri na cruz pa ningun hende.

P'esey mi stima nan huy for di idolatria, boso no por bebe e copa di Señor y e copa di demoñonan, boso no por tuma parti na e mesa di Señor y na e mesa di demoñonan. Of ta provoca nos ta provoca Señor pa hacie bira jaloers? Acaso nos ta mas fuerte cu Dios. (1 Corintionan 10:14 y vers 21-22).

Nos a drenta den un era di idolatria moderno, cual ta droga, droga ta idolatria, droga ta pone hende horta cosnan di nan sernan keri, secuestra hende mata hende, djis pa haya droga, bende nan propio curpa pa droga, perde nan trabao y famia pa motibo di droga, pasobra nan ta stima droga mas cu Dios.

Otro tipo di idolatria moderno ta "Orguyo" pasobra ta para skirbi den 2 Timoteo 3:1-9 cu den e ultimo dianan temponan trabahoso lo bini, pasobra hende lo bira stimado di nan mes mas cu Dios. Ora un hende bira orguyoso e ta bira estimado di su mes, esey ta nifica ami prome. Y asina idolatria ta lanta cabes y cuminsa domina bida di hende te na momento, cu nan ta rechasa Dios, y bira estimado di placer mas cu Dios.

Tur hende cu mester di Dios, por acerca Dios pa medio di Su Yiu Cristo Hesus, Hesus a bisa tur locual boso pidi den mi nomber, Mi Tata cu ta den cielo lo hacie pa boso, Hesus a bisa caminda dos o tres reuni den Mi nomber, eyan lo Mi t'ey memey di boso.

Ningun imagen no tin acceso na e trono di gracia di Dios, pasobra nan no por move, alaba, tampoco haci oracion, ta nos tur cu a wordo crea den imagen y semehansa di Dios solamente por alaba y glorifica e nomber di Dios.

Nos tin un representante y abogado dilanti di Dios, y su nomber ta Hesus Cristo di Nazaret, solamente den dj'E nos ta confia y kere, pasobra e ta nos speransa y nos pronto auxilio tur momento.

Ningun imagen no por representa nos dilanti di Dios.

Corda e oracion cu Cristo Hesus mes a siña nos cu ta Nos Tata.

*Sinceramente, Pastor Marcel Balootje*





Jehova es mi Pastor,  
nada me faltará. Salmo 23:1

Cu dolor na nos curason, nos ta participa  
fayecimento di nos ser stima:

## Vincente P. Lampe

\*19-07-1949 - †03-03-2023

Na number di su:

**Casa:** Maria Antonia Lampe

### Yiunan:

Jandor Lampe  
Ivelisse Lampe  
Evelyn Lampe-Veen  
Romer Lampe

**Ruman:** Martilia Lampe Curiel

**Nuera:** Santa Lampe

**Nuero:** Marcel Veen

### Nietonan:

Bryan Veen, Kevin Veen, Lannys de Mey,  
Ismahilyn de Mey, Pamela de Mey, Richelisse  
van den Berg, Stanley Lampe, Perla Lampe,  
Shainy Lampe, Solange Lampe, Kaina Lampe,  
Shandel Lampe, Marianny Lampe, Jader Lampe

### Demas famia:

Lampe, Curiel, Hernandez, Gonzales, van den  
Berg, de Mey, de Jesus, Veen

Ta invita pa acto di entierro cual lo tuma lugar  
**diahuebs 9 di maart 2023** na Royal Funeral Home  
di 9'or pa 11'or di mainta. Despues lo sali pa  
Santana Central Sabana Basora.

Condolencia lo tuma lugar diaranson 8 di maart  
2023 na Royal Funeral Home di 7'or pa 9'or di  
anochi.

Nos disculpa si den nos tristesa nos por a lubida  
algun famia of conocir.



### Gradicimento y Invitacion

Pa medio di esaki famia kier a gradici tur esnan  
cu na un manera of otro a duna nos sosten, consuelo y  
forsa durante e tempo dificil cu e fayecimento y entierro  
di nos defunto stima:

## Sr. Antonio Koolman

"Cholin of Dingi"

Boso muestra di atencion ta di hopi aprecio y un gran  
sosten pa nos. Un danki na un y tur cu a manda carchi,  
krans, whatsapp, email, facebook y a hasi yamada nan  
telefonico. Na personal y staff di Stichting HOPE cu a  
cuida nos Pachi stima.

Tambe na pastoor Toti y pastoor Jairo Maduro.  
Tambe na Aurora Funeral Home pa cu su bon servicio  
y atencion. Boso muestra di atenshon tabata un gran  
consuelo pa nos.

Na mes momento nos ta invita famia, bisiña-, amigo- y  
conocirnan pa compaña nos na 2 Santo Sacrificio di  
Misa na misa Inmaculada Concepcion na Sta. Cruz;  
diamars 7 y diahuebs 9 di maart pa 7:00 pm. Despues di  
ultimo misa lo tin un rosario na cas; Cas Ariba # 8

Boso presencia ta altamente aprecia.



Tur cos aki na mundo tin su ora y su tempo,  
Ora pa nace y ora pa muri, ora pa yora  
y ora pa hari, Ora pa keda keto y ora pa  
papia, ora pa stima y ora pa odia, Ora pa  
guerra y ora pa paz"  
Predicador 3:1-2-4-7-8

Cu hopi tristesa pero conforme cu  
boluntad di Dios nos ta anuncia cu a bay  
laga nos den brasa di Señor

## Evarista Kelly-Maduro

Cariñosamente yama "Dudi"  
\*26-10-1938 - †03-03-2023

### Casa:

† Antonio Kelly

### Yiunan:

Eusebio Wilfrido y Leta Kelly  
Teodora Fransisca Kelly  
Cristobal Fidencio Kelly

### Nieto(a)nan:

Jeanise Irene y Jesus Paredes  
Roxann Kelly  
Reginald y Vanessa Kelly  
Joseline Arrindell  
Bisnieto(a)nan  
Jonatan Paredes  
Joshua Paredes  
Alexa Kelly Ryliaann Kelly  
Reyvenn Kelly

### Ruman:

Carmelo Maduro

Sobrino y sobrinanan

### Cuñá:

Imelda Maduro

Primo(a)nan, amigo y conocirnan, bisiñanan

### Demas famia:

Maduro, Kelly, Werleman, Geerman, Roga,  
Kock, Paredes, Croes

Ta invita pa acto di despedida cu lo tuma  
lugar **diamars 7 di maart 2023** na Aurora  
Funeral Home di 2'or pa 4'or di atardi.

Acto di cremashon lo tuma lugar den seno  
familiar. Despues di cremashon no ta ricibi  
bishiti di condolencia na cas.

Nos disculpa si den nos tristesa nos por a  
lubida cualkier persona.



# Blessed

ARE THE PURE IN HEART,  
FOR THEY WILL SEE GOD.

MATTHEW 5:8



"Señor ta mi wardador, mi'n tin falta di nada.  
Den cunucu di yerba berde e ta ponemi sosega.  
E ta hibami na awa trankil,  
pa mi bolbe haña forsa".  
Salmo: 23

Conforme cu boluntad di Dios, nos ta participa  
fayecimento cristianamente di:

## Richard Edwin Simon

Mihor conoci como "Richard Barbero"  
\*12-06-1936 - †01-03-2023

Na number di su:

### Yiu:

Maritza Wever y famia

### Rumannan:

†Gerard "Boy" Simon y Calista Simon-Koolman y  
famia  
Graciela "Chelita" Simon  
†Marvel "Mies" Aalberse-Simon y famia  
Violeta Olano-Simon y Delfin Olano y famia  
Robert "Roy" Simon y Carmen Simon-Harms y  
famia

### Su primo y primanan

### Su sobrino y sobrinanan

### Famianan:

Blanco, Wever, Croes, Paesch

Demas famia, bisiñanan, amistadnan y  
conocirnan ta invita pa e acto di condolencia y  
despedida di "Richard" cu lo tuma lugar dialuna  
6 di maart 2023 di 2'or pa 4'or di atardi na Aurora  
Funeral Home. Cremacion lo tuma lugar den  
seno familiar.

Ta lamenta cu no por ricibi bishita di condolencia  
na cas



Laga tur loke ta spera mi ta bunita  
Laga tur locual cu mi encontra  
na caminda ta bunita  
Laga tur locual cu mi laga  
atras keda bunita y  
Laga esakinan termina den tur buniteza.  
Cado Wever.



Cu profundo tristeza nos a anuncia cu a fayece:

## Rey Tromp

\*28-10-1951 - †26-02-2023

Acto di despedida ta wordo anuncia despues.





'No tuma vengansa ni warda rencor contra bo paisano. Al contrario, stima bo prohimo manera boso mes'. Levitico 19:18

### Myloushka Natasha Wernet Burleson

\*15-10-1971 - †24 - 02- 2023

**Esposo:** Clem Nildo Wernet

**Yiunan:**  
Nildo Junior Wernet  
Niloushka Wernet

**Manera yiu:**  
Ruby Schwengle y yiunan

**Mayornan:**  
Henry y Maria Burleson-Helder

**Rumannan:**  
Anoutcka y Raymond Koolman  
Ryangela y Antony Lanoy-Maduro y yiunan

**Sobrinu/nan:**  
Roshan Wernet y Gilmarie Jansen y yiunan  
Seychella Koolman  
Randall Wernet y Mayla Ridderstap y yiu  
Andre Wernet y Ginayla Hernandez  
Gillian Wernet y Jurney Tromp  
Roxanne y Roxienne Wernet  
Azair Koolman

**Tanta/Omo:**  
†Walter y †Alba Arends-Albus y yiunan  
Nicasio y †Lidia Helder-Loopstok y yiunan  
†Angela y †Frans van Cleef-Helder y yiunan  
†Seferina y Hubert Schoobaar-Helder y yiu  
†Marcolino Helder  
†Juan Rafael y †Rosa Helder-Tromp y yiunan  
Benita y Virgilio Davelaar-Helder y yiunan  
Miriam y Richard Boekhoudt-Helder y yiunan  
†Edwin y Cornelia Zichem-Bergen y yiunan  
Olga y †Nicolas (Chito) Jacobs-Zichem y yiunan  
Greta (madrina) y †Ofilo Jacobs-Zichem y yiunan  
†Ludwig (Padrino Luty) y Annie Burleson-Zievinger y yiunan  
Theodore (Theo) y Carla Burleson-Huijgen  
Antoinette (Netty) Burleson y Franklin Kock y yiunan  
†Edgard y Gina Burleson-Werleman y yiu  
†Imelda Burleson  
†August (Popoy) Reyes y Marla Rodriguez y yiunan

**Suegro/a:** Mario y Lidia Wernet Bislip

**Swa/Cuñia:**  
Robert y Angeline Wernet-Jeandor  
Roland y Reinalda Wernet-Ras

**Omo grandi:**  
Anton y Martha Burleson-Labeille y yiunan  
Boy y Aura van Ommeren-Croes y yiunan

Ihanan

**Demas famia y conocirnan:** Burleson, Wernet, Helder, Zichem, Perrotte, Dirks, Garcia, Nicolaas, Jacobs, Reyes, Paula, van Ommeren, Bergen, Kelly, Zievinger, Huijgen, Kock, Werleman, Hughes, Koolman, Rodriguez, Becker, Komproe, Rodriquez, Marchena, Toppenberg, Hoo, Arends, Davelaar, van Cleef, Schoobaar, Maccow, Boekhoudt, Middendorp, Hirschfeld, Franciscus, Alvarez, Obispo, Candelaria, Albus, Tromp, Donata, van der Biezen, Constancia, Dirks, Thode, Kelly, Luydens, Vingal, Maduro, Geerman, Kamperveen, Reinoso, Rasmijn, Noguera, Bislip, Ras, Jeandor, Croes, Franken, Croeze, Krozendijk, Maduro, Hessing, Kelly-Hsing, Lanoy,Snijders, Hoek y bisiañan

Ex coleganan di H.O.H especial kinderafdeling, coleganan di Colegio EPI, especialmente Unit Salubridad y Servicio

**Personanan special:** Sandra Geerman, Janine Dirks-Maduro, Sharlene Hassell, Rene Molano Vergarra y famia, Tante Ayleen Snijders-Tromp y Yola Snijders, Maritza Verstappen-Wever, Janine Quant, Eeman Baroud, Damira Odor, Luis Rodulfo, Rimmie Tromp, Juliete Peterson

Grupo di orashon: Cristo ta Amor, especialmente Reina, Dorothy, Vivian, Daphne

Wilhelmina Kankerfonds: Sandra Koolman, Arelis Gonzalez, Lola Geerman Dr. Marcel Ho-Kang-You, Dr. Selene Kock



**Oportunidad pa condolencia:** diabierna 3 di maart 2023 na Royal Funeral Home di 6:00 pa 9:00 pm.

Ta invita pa e acto di entieru cu lo tuma lugar **dialuna 6 di maart 2023** na misa Pro Catedral San Francisco di 1:00 pa 4:00 pm, despues lo sali pa Santana catolico na Playa.

Enbes di flor of krans un donacion pa Wilhelmnina Kankerfonds lo ta altamente aprecia.

Pa e gesto aki lo tin un box disponibel den misa.

Myloushka su deseo ta pa bin bisti na colornan alegre.



'No tuma vengansa ni warda rencor contra bo paisano. Al contrario, stima bo prohimo manera boso mes'. Levitico 19:18

Primo y primanan ta anuncia fayecimento di nos prima stima:

### Myloushka Natasha Wernet Burleson

15 – 10 – 1971 - 24 - 02- 2023

Na number di su **Esposo:**  
Clem Nildo Wernet

**Yiunan:**  
Nildo Junior Wernet  
Niloushka Wernet

**Manera yui:**  
Ruby Schwengle y yiunan

**Mayornan:**  
Henry y Maria Burleson-Helder

**Suegro/a:**  
Mario y Lidia Wernet Bislip

**Rumannan:**  
Anoutcka y Raymond Koolman  
Ryangela y Antony Lanoy-Maduro y yiunan

**Primo/anana:**  
Elvis Zichem y famia, Glenda Dirks-Zichem y famia,  
Yvette Zichem y famia, Debby Kock y famia,  
†Lily Zichem, Franklin Zichem, Muriella (Ella) Perrotte-Jacobs y famia, Sherwin Jacobs y famia, Nicole Jacobs y famia, Kenrick Jacobs, Leslie Jacobs, Suzanne Garcia-Burleson y famia, Charaima Burleson, Sunhail Nicolaas-Burleson y famia,  
Ludwig Burleson y famia, Joshua Burleson y famia,  
†Maureen Burleson, Allric Kock y famia, Joanne Kock y famia, Miguelito Burleson, Farah Reyes y famia, Suhaila Reyes y famia, Alex Arends y famia, Rudolf (Dopi) Arends y famia, Robert (Roy) Arends y famia, Franklin (Kinchi) Arends y famia,  
Noriza (Popy) Hoo-Helder y famia, Richard (Gigi) Helder y famia, Julissa (Liesje) Helder y famia, Gregory Helder y famia, Maikel van Cleef y famia, Sandra van Cleef y famia, Karel van Cleef y famia, John van Cleef, Sherlines Maccow- Schoobaar y famia, Ronald Helder y famia, Reynold Helder y famia, Randolph Helder y famia, Gwenn Davelaar, Golda Candelaria-Davelaar y famia, Richard Boekhoudt y famia, Reginald Boekhoudt y famia,

**Oportunidad pa condolencia:**  
diabierna 3 di maart 2023 na Royal Funeral Home di 6:00 pa 9:00 pm.

Ta invita pa e acto di entieru cu lo tuma lugar **dialuna 6 di maart 2023** na misa Pro Catedral San Francisco di 1:00 pa 4:00 pm, despues lo sali pa Santana catolico na Playa.

Enbes di flor of krans un donacion pa Wilhelmnina Kankerfonds lo ta altamente aprecia.

Pa e gesto aki lo tin un box disponibel den misa.

Myloushka su deseo ta pa bin bisti na colornan alegre.



“Señor ta mi wardador,  
mi'n tin falta di nada  
Den cunucu di yerba berde  
e ta ponemi sosega.  
E ta hibami na awa frankil,  
Pa mi bolbe haña forza”.  
Salmo: 23

Nos ta anuncia fayecimento di:

### Manuel Goncalves Norberto

\*09 maart 1929 Madeira  
+25 Februari 2023 Aruba

Na number di su: **Esposa:**  
†Nueva Norberto-Rasmijn

**Yiunan:**  
†Manuel Juan Benjamin Norberto  
Maria Elizabeth Norberto  
†Maria Angelina Norberto  
Jose Pedro y Eliana Norberto-Teles  
Jose Fernando y Loraine Norberto-Tromp

**Nieto(a)nan:**  
Ivo Valdes y Nathalie Kreekel  
Raymond Valdes y Stephanie Donata  
Sarah Norberto na Brasil  
Pedro Norberto na Brasil  
Isabella Norberto  
Carolynne Norberto

**Bisanieto(a)nan:**  
Lincoln y Myleight Valdes

**Rumannan:**  
†Maria Angelina Gonçalves na Brasil  
†Jose Antônio y Vera Gonçalves Norberto y Famia na Brasil  
†Maria Isabel Norberto y Famia na Brasil  
†Maria Rosa Norberto y Famia na Brasil  
†Maria Alda Norberto y Famia na Brasil  
Maria Martha Norberto y famia na Brasil

**Sobrinu(a)nan:** na Aruba y na Brasil

**Swa y cuñanan:**  
Ica Rasmijn y Famia na Hulanda  
†Jose Rasmijn Y Famia  
†Alberto Rasmijn y Famia  
Emerita Rasmijn y Famia  
Felix Rasmijn y Famia na Corsow  
Dilia Rasmijn y Famia  
†Jet Rasmijn y Famia  
Pedro Rasmijn y Famia

**Amigo di cas:** Carlito Weller

amigo y amiganan y conocirnan di Fundação Social Cultural Portuguesa  
Tur cu a cuide na Cas Cristella

**Demas famia:** Norberto, Rasmijn, Valdes, Teles, Tromp, Kreekel, Donata, De Cuba, Jansen, Filiciana, De Veer, Van der Biezen, Weller, Winterdaal, Shada

Despensa nos si den nos tristeza nos por a lubida un of otro persona

Ta invita pa e acto di despedida cu lo tuma lugar diahuebs 9 di maart 2023 na Aurora Funeral Home di 9:00 pa 11:00 di mainta, sigi pa e acto di cremacion.





# AWEMainta

## Scan nos QR code y bira abonado di AWEMainta

Completamente GRATIS

1: Usando bo camera di telefon,  
scan nos QR code na banda.

2. Bay riba "Show Options",  
"Open in browser".

3. Yena e formulario.

**Haya AWEMainta  
tur dia den bo inbox!**



[www.awemainta.com](http://www.awemainta.com)



[www.facebook.com/AWEMainta](https://www.facebook.com/AWEMainta)



5880022



[info@awemainta.com](mailto:info@awemainta.com)  
[noticia@awemainta.com](mailto:noticia@awemainta.com)  
[aviso@awemainta.com](mailto:aviso@awemainta.com)